

CONVENIO DE COLABORACIÓN ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA E OS CONCELLOS DE TOÉN E BARBADÁS PARA A EXECUCIÓN DO PROXECTO DENOMINADO ACONDICIONAMENTO DE VÍA PÚBLICA ENTRE MOREIRAS E SOBRADO

Santiago de Compostela, 13 de agosto de 2018

REUNIDOS

Dunha parte, Alfonso Rueda Valenzuela, vicepresidente e conselleiro da Presidencia, Administracións Públicas e Xustiza, actuando en nome e representación da Xunta de Galicia, en virtude do Decreto 148/2016, do 13 de novembro, polo que se nomean os titulares dos departamentos da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia.

Por outra parte, Amancio Antonio Cid Pérez, alcalde do Concello de Toén, e Xosé C. Valcárcel Doval, alcalde do Concello de Barbadás, actuando en virtude das facultades representativas que lles atribúen o artigo 21.1 b) da Lei 7/1985, de 2 de abril, reguladora das bases do réxime local e o artigo 61.1.a) da Lei 5/1997, do 22 de xullo, de Administración Local de Galicia.

As persoas reunidas actúan no exercicio dos seus cargos e, na representación que ostentan, recoñécense capacidade para obrigarse nos termos do presente convenio de colaboración e para o efecto

EXPOÑEN

Primeiro. A Lei 39/2015, do 1 de outubro, do procedemento administrativo común das administracións públicas, a Lei 40/2015, do 1 de outubro, do réxime xurídico do sector público e a Lei 5/1997, do 22 de xullo, de Administración Local de Galicia (en adiante LALGA), recollen ao longo do seu articulado o principio xeral de colaboración interadministrativa.

Segundo. Entre as competencias que lle corresponden á Xunta de Galicia en materia de relacións coas entidades locais galegas, de acordo co disposto nos artigos 194 e 195 da LALGA, figuran as de cooperación e colaboración, mediante subvencións eventuais ou continuas, que poderán materializarse, entre outras posibilidades, a través da subscripción de convenios.

Neste mesmo senso, o artigo 48 da Lei 40/2015, do 1 de outubro, de réxime xurídico do sector público, establece que as administracións públicas, os seus organismos públicos e entidades de dereito público vinculados ou dependentes e as universidades públicas, no ámbito das súas respectivas competencias, poderán subscribir convenios de colaboración con suxeitos de dereito público e privado, sen que isto poida supor cesión da titularidade da competencia.

Terceiro. O Decreto 72/2013, do 25 de abril, polo que se establece a estrutura orgánica da Vicepresidencia e da Consellería de Presidencia, Administracións Públicas e Xustiza, configura esta como o departamento da Xunta de Galicia ao cal lle corresponde a elaboración, proposta e execución da política do goberno en materia de administración local, atribuíndolle, entre outras as competencias en materia de asistencia á Administración local.

Á súa vez, o artigo 20 do antedito decreto determina que a Dirección Xeral de Administración Local é o órgano encargado da xestión das competencias atribuídas á Xunta de Galicia en materia de Administración local e a este centro directivo correspóndelle, en particular, o fomento



das liñas de colaboración coas entidades locais galegas no referente á convocatoria e execución das subvencións a elas destinadas.

Cuarto. Segundo dispoñen os artigos 25 e 26.1 da Lei 7/1985, do 2 de abril, reguladora das bases do réxime local e os artigos 80 e 81 da Lei 5/1997, do 22 de xullo, de Administración Local de Galicia, os concellos deberán prestar á súa cidadanía os servizos públicos que contribúan a satisfacer as necesidades e aspiracións da comunidade de veciños.

Pola súa banda, a Comunidade Autónoma de Galicia ten como obxectivo o desenvolvemento equilibrado do territorio galego, do medio rural e do urbano, do interior e da faixa costeira, que permita o desenvolvemento económico da totalidade do territorio e que a cidadanía galega teña unhas óptimas condicións de vida, con independencia do seu lugar de residencia, potenciando e apoiando a prestación de servizos por parte dos nosos concellos que son a Administración máis próxima aos administrados.

Quinto. A Vicepresidencia e Consellería de Presidencia, Administracións Públicas e Xustiza regulou, por medio da Orde do 4 de decembro de 2017, a concesión de axudas económicas aos concellos de Galicia, en réxime de concorrència competitiva, destinadas á creación e/ou mellora das infraestruturas, dotacións, instalacións e equipamentos vinculados á prestación de servizos municipais, destinados a concellos de Galicia para o ano 2018 (DOG núm. 5, do 8 de xaneiro).

Mediante a devandita orde a Xunta de Galicia materializou a súa vontade de colaborar cos concellos na implantación e mellora dos servizos básicos demandados pola poboación. A convocatoria, instrución e resolución do procedemento iniciado pola antedita orde, finalizou coa concesión de axudas a todos os concellos solicitantes que cumprían os requisitos esixidos polas bases reguladoras e acadaron a puntuación mínima determinada pola Comisión designada para a valoración dos proxectos, ata o esgotamento do crédito destinado ao financiamento da convocatoria.

Sexto. Logo da tramitación desta convocatoria, no concepto orzamentario que a financia, e dentro do código de proxecto 2017 00054 *Proxecto de desenvolvemento dos entes locais* existe un saldo de crédito, financiado exclusivamente con fondos propios da Comunidade Autónoma, que se considera axeitado e suficiente para a súa aplicación eficaz na colaboración coas entidades locais de Galicia na mellora na calidade da prestación dos servizos municipais.

Por esta razón, a Vicepresidencia e Consellería de Presidencia, Administracións Públicas e Xustiza, no exercicio das súas competencias, pretende colaborar coas entidades locais apoiando aquelas actuacións cuxa finalidade sexa a creación e/ou mellora de infraestruturas, dotacións, instalacións e equipamentos vinculados á prestación de servizos municipais naqueles concellos que amosaron o seu interese para obter unha axuda destinada á execución deste tipo de proxectos mediante a presentación dunha solicitude ao abeiro da devandita convocatoria en concorrència competitiva, pero non puideron acceder a ela por non ter acadado a puntuación mínima determinada pola Comisión de Valoración.

A Xunta de Galicia presta así un apoio especialmente necesario neste caso, considerando as particulares circunstancias destes concellos, que veñen incidir nun contexto orzamentario restritivo e necesariamente estable do que deriva, entre outras consecuencias, as dificultades para afrontar en solitario os compromisos económicos que o obxecto destas subvencións representa para as facendas municipais, que precisan da creación ou mellora das infraestruturas para a adecuada prestación dos servizos municipais.

Xa que logo, instrumentaranse mediante convenio as axudas para os proxectos promovidos por aqueles concellos que presentaron solicitude ao abeiro da Orde do 4 de decembro de 2017, que non resultaron beneficiarios por esgotamento do crédito destinado ao financiamento desta convocatoria, ata un importe máximo total de 500.000,00 €, respectando a orde de prelación que estableceu a Comisión de valoración prevista na devandita convocatoria.

Sétimo. Garantidos os principios de concorrencia, transparencia, publicidade, obxectividade, igualdade e non discriminación mediante a convocatoria, instrución e resolución do procedemento iniciado pola Orde do 4 de decembro de 2017, a existencia dun saldo de crédito susceptible de aplicación eficaz na eliminación das carencias nas infraestruturas de uso público sobre as que se actuará a través do convenio que se pretende subscribir, e considerando inviable unha nova convocatoria que teña por obxecto este tipo de actuacións, polo custo temporal da tramitación dun procedemento destas características, enténdese suficientemente acreditadas as razóns de interese público que xustifican o recurso ao procedemento excepcional de concesión directa dunha subvención a favor dos Concellos de Toén e Barbadás.

Oitavo. Os proxectos de investimento para a creación ou mellora de infraestruturas en cuxa realización se pretende colaborar resultan de interese para a Xunta de Galicia polo que supoñen de potenciación e apoio ao desenvolvemento territorial equilibrado para a mellora da calidade de vida da veciñanza mediante a prestación de servizos de calidade por parte dos nosos concellos que son a Administración máis próxima á cidadanía.

O obxectivo común é conseguir ou recuperar un óptimo nivel de funcionamento das infraestruturas municipais, de forma que os concellos poidan prestar servizos de calidade á veciñanza con independencia do seu lugar de residencia.

Noveno. Conforme co establecido no artigo 26.2 da Lei 9/2007, do 13 de xuño, de subvencións de Galicia, faise constar que neste convenio non son de aplicación os principios de publicidade e concorrencia pública, xa que o obxecto do convenio é atender as circunstancias específicas do Concello de Toén e do Concello de Barbadás, co fin de que poidan mellorar as infraestruturas vinculadas á prestación dos servizos municipais e, xa que logo, contribuír a un óptimo funcionamento das funcións que ten encomendadas e dos servizos que se prestan á veciñanza.

Décimo. Os concellos de Toén e Barbadás cumpren cos requisitos para obter a condición de beneficiario da subvención de acordo co disposto no artigo 10 da Lei 9/2007, do 13 de xuño, de subvencións de Galicia.

Décimo primeiro. O 6 de febreiro de 2018 os concellos de Toén e Barbadás asinaron un convenio de colaboración para a xestión compartida do proxecto de *Acondicionamento de vía pública entre Moreiras e Sobrado*. Neste convenio désignase ao Concello de Toén como responsable técnico e administrativo da xestión da axuda para o financiamento do proxecto en cuestión e, polo tanto, representante da asociación de concellos e encargado de realizar a solicitude e xustificación das axudas.

Décimo segundo. A achega económica da Xunta de Galicia farase efectiva con cargo á aplicación orzamentaria 05.23.141A.760.2 (CP 2017 00054 Proxecto de desenvolvemento dos entes locais) e poderá acadar ata o 60% do custo do proxecto subvencionado, cun máximo de 40.000,00 €.

Décimo terceiro. En base a todo o anterior, co fin de materializar a colaboración antes descrita e estimando que concorren as circunstancias que así o aconsellan, a Vicepresidencia e Consellería de Presidencia Administracións Públicas e Xustiza e os Concellos de Toén e Barbadás acordan subscribir o presente convenio de colaboración, de conformidade coas seguintes

CLÁUSULAS

Primeira. Obxecto.

O obxecto do presente convenio é fixar as liñas de colaboración entre a Vicepresidencia e Consellería de Presidencia, Administracións Públicas e Xustiza e os concellos de Toén e Barbadás para a execución do proxecto denominado *Acondicionamento de vía pública entre Moreiras e Sobrado*, cun orzamento total de 60.500,00 € (IVE incluído), segundo o anteproxecto do mesmo

título, redactado polo técnico Daniel Durán Arriero en xaneiro de 2018, cuxo orzamento se xunta como anexo I a este convenio e do cal forma parte.

Segunda. Obrigas dos concellos.

Ademais das establecidas con carácter xeral na Lei 9/2007, do 13 de xuño, de subvencións de Galicia e na súa normativa de desenvolvemento, son obrigas dos concellos de Toén e Barbadás:

1. Cumprir o obxectivo, executar o proxecto, realizar a actividade ou adoptar o comportamento que fundamenta a concesión da subvención.
2. Destinar os fondos que se perciban ao obxecto concreto para o que se concede esta subvención, executar as actuacións que constitúen o obxecto deste convenio e cumprir todas as condicións e obrigas recollidas nel.
3. Xustificar ante o órgano concedente o cumprimento da finalidade da subvención, a realización da actividade ou adopción do comportamento que fundamentou a súa concesión e o seu custo real, no prazo e na forma establecidos neste convenio e demais normativa de aplicación.
4. Tramitar o expediente de contratación da obra conforme á normativa de aplicación no ámbito local e, especificamente, á que rexe as contratacións das administracións públicas; será o concello contratante o responsable directo das consecuencias que dos incumprimentos puidesen derivar.

Os concellos beneficiarios estarán ao disposto no artigo 29.3 da Lei de subvencións de Galicia e nos artigos 9.c) e 10.e) do Decreto 193/2011, do 6 de outubro, polo que se regulan especialidades nas subvencións ás entidades locais galegas.

5. Proceder ao reintegro, total ou parcial, das cantidades percibidas, se as houbese, xunto cos xuros de demora correspondentes, segundo o procedemento establecido no artigo 38 da Lei de subvencións de Galicia, nos seguintes supostos:
 - a. Incumprimento das condicións establecidas para a concesión da subvención e para a correcta execución e xustificación do proxecto subvencionado.
 - b. Incumprimento da obriga de xustificar a efectividade dos pagamentos nos termos da cláusula oitava deste convenio.
 - c. Reintegrarse o exceso de financiamento público polo importe pagado que exceda da cantidade resultante de aplicar ao gasto xustificado a porcentaxe de subvención correspondente, nos termos do artigo 21 do Decreto 11/2009, do 8 de xaneiro.
 - d. No suposto de que se produza exceso das subvencións percibidas de distintas entidades públicas respecto do custo do proxecto ou actividade, nos termos do artigo 23 do Decreto 11/2009, do 8 de xaneiro.
 - e. Incumprimento das obrigas establecidas no artigo 11 e 15 da Lei 9/2007, do 13 de xuño, de subvencións de Galicia.
 - f. Nos demais supostos de aplicación, nomeadamente os establecidos no artigo 33 da Lei 9/2007, do 13 de xuño.
6. Destinar os bens ao fin concreto para o que se concede a subvención durante un período mínimo de cinco anos, procedendo ao reintegro das cantidades percibidas no caso de incumprimento desta obriga. A axuda só será definitiva se non sofre antes de transcorridos cinco anos do seu remate unha modificación que afecte á natureza do investimento.
7. Comunicarlle ao órgano concedente a obtención de subvencións, axudas, ingresos ou recursos que financien as actividades subvencionadas. Esta comunicación deberá efectuarse no momento en que se coñeza e, en todo caso, con anterioridade á xustificación da aplicación dada aos fondos percibidos.



8. Consentir expresamente a inclusión dos datos relevantes deste convenio nos rexistros públicos que proceda, conforme coa disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, dos orzamentos xerais da comunidade autónoma para o exercicio 2006 e artigo 16 da Lei 9/2007, do 13 de xuño, de subvencións de Galicia.
9. Prestar a colaboración e facilitar canta documentación lle sexa requirida, no exercicio das funcións de control que lle corresponden á Intervención Xeral da Comunidade Autónoma, ao Consello de Contas e ao Tribunal de Contas, así como o sometemento ás actuacións de supervisión e control previstas na Lei 9/2007, do 13 de xuño, de subvencións de Galicia e as xerais derivadas da aplicación da normativa de axudas e subvencións.
10. O alcalde do Concello de Toén é o representante legal da agrupación, con poderes suficientes para cumprir todas as obrigas que coma entidade beneficiaria corresponden á agrupación e actuará como coordinador, interlocutor, receptor e xustificador da axuda.
11. Os concellos de Toén e Barbadás asumen o compromiso solidario de execución e de aplicación solidaria da subvención.

Terceira. Obrigas da Vicepresidencia e Consellería de Presidencia, Administracións Públicas e Xustiza

1. A Xunta de Galicia, a través da Vicepresidencia e Consellería de Presidencia, Administracións Públicas e Xustiza, cooperará na realización da actuación á que se refire a cláusula primeira deste convenio de colaboración, mediante a achega máxima de TRINTA E SEIS MIL TRESCENTOS EUROS (36.300,00 €) con cargo á aplicación orzamentaria 05.23.141A.760.2 (CP 2017 00054 Proxecto de desenvolvemento dos entes locais) dos orzamentos xerais da Comunidade Autónoma para o ano 2018. Este importe representa o 60% do orzamento total do proxecto que constitúe o obxecto deste convenio.
2. No caso de que o investimento realizado teña un custo inferior ao inicialmente previsto e sempre que isto non supoña unha realización deficiente da totalidade do proxecto, a contía da subvención reducirase proporcionalmente, manténdose constante a porcentaxe da axuda respecto ao custo total do investimento.

Cuarta. Gastos subvencionables

Ao abeiro deste convenio poderán financiarse os gastos nos que tivesen incorrido os concellos como consecuencia da realización de actuacións acordes co obxecto do convenio, incluso aqueles que se teñan efectuado con anterioridade á sinatura deste, sempre que se trate de gastos correspondentes ao actual exercicio económico.

Quinta. Publicidade dos convenios subvencionados

As entidades beneficiarias deberán dar publicidade do financiamento do proxecto pola Xunta de Galicia, de acordo coa imaxe corporativa oficial. As medidas de publicidade consistirán na colocación de cartel publicitario e de placa explicativa permanente:

1. O cartel publicitario estará colocado durante a execución do proxecto, no modelo que se incorpora no anexo II a este convenio, en que conste expresamente o financiamento da Xunta de Galicia. Se o proxecto comprende varias actuacións, a obriga de publicidade entenderase referida a cada unha delas.
2. Colocarase unha placa explicativa permanente en todos os lugares en que se desenvolvan as actuacións, de acordo co modelo que se incorpora como anexo II a este convenio, en que conste expresamente o financiamento da Xunta de Galicia.

Sexta. Conta xustificativa

1. Para percibir o importe da subvención e para xustificar a aplicación dos fondos percibidos, o Concello de Toén, como representante da agrupación de concellos, deberá acreditar a execución do proxecto subvencionado mediante a presentación da seguinte documentación:

- a) Facturas e, de ser o caso, certificacións de obra con relación valorada e tramitada conforme o procedemento que rexe para a Administración local.
- b) Declaración responsable asinada electronicamente pola persoa representante da entidade beneficiaria, en que se faga constar:

- O conxunto de todas as axudas solicitadas ou concedidas, para as mesmas actuacións solicitadas ao abeiro desta orde, das distintas administracións públicas competentes ou outros entes públicos e o compromiso de comunicar de contado cantas axudas solicite e/ou obteña doutras administracións públicas ou doutros entes públicos ou privados, nacionais ou internacionais, a partir da data desta declaración.
- Que o concello non está incurso en ningunha das prohibicións establecidas no artigo 10, números 2 e 3, da Lei 9/2007, do 13 de xuño, de subvencións de Galicia, para obter a condición de beneficiario dunha subvención.

Para os efectos do previsto no artigo 31.7 e concordantes da Lei de subvencións de Galicia, esta declaración será documento suficiente para acreditar que o concello está ao día nas súas obrigas tributarias e fronte á Seguridade Social e que non ten pendente de pagamento ningunha outra débeda coa Administración pública da Comunidade Autónoma e que non é debedor por resolución de procedemento de reintegro.

- Prezos dos carteis informativos e das placas explicativas así como a data de colocación de cada un destes elementos.

c) Certificación emitida e asinada electronicamente pola secretaria ou polo secretario do concello representante, na cal se faga constar:

- O acordo de aprobación polo órgano competente do concello representante das facturas e, no caso de obras, das correspondentes certificacións de obra, na cal conste que se cumpriu a finalidade para a cal foi concedida a subvención.
- Que, segundo informe da intervención municipal, se tomou razón na contabilidade, en fase de recoñecemento da obriga, dos gastos correspondentes á execución do proxecto subvencionado.
- Que na tramitación e contratación das obras e/ou equipamentos se cumpriu a normativa de aplicación no ámbito local e, especificamente, a que rexe as contratacións das administracións públicas.

d) En cumprimento das obrigas de publicidade establecidas na orde deberán achegar ademais:

- Fotografías do lugar ou lugares onde se efectuasen as actuacións, tomadas antes, durante e con posterioridade á súa realización. A presentación das fotografías farase de xeito que permita identificar os lugares e o momento da execución a que correspondan.

Fotografías do cartel ou carteis das actuacións, segundo o modelo do anexo II deste convenio.



- Fotografías da placa ou placas explicativas permanentes, no modelo do anexo II deste convenio, colocadas nun lugar visible no lugar das actuacións, que deberán permanecer durante, cando menos, cinco anos.
- e) Nos supostos en que sexa esixible, a entidade beneficiaria deberá presentar:
- As tres ofertas que debe solicitar e obter.
 - Copia compulsada da resolución de adxudicación da obra ou equipamento, onde quede acreditado que a elección entre as ofertas recaeu na proposta económica máis vantaxosa.
2. A Dirección Xeral de Administración Local poderá solicitar calquera outra documentación necesaria para a correcta verificación da subvención.
 3. A falta de presentación da xustificación no prazo indicado comportará a perda do dereito ao cobramento da subvención e demais responsabilidades establecidas na Lei de subvencións de Galicia, sen prexuízo do previsto nos artigos 45.2 e 46 do Decreto 11/2009, do 8 de xaneiro
 4. A data límite para a execución das actuacións subvencionadas e para presentar a documentación xustificativa da subvención será o 15 de novembro de 2018.

Sétima. Subcontratación parcial ou total

1. Para a execución do proxecto que constitúe o obxecto deste convenio o Concello de Toén poderá subcontratar parcial ou totalmente a actividade ou investimento subvencionado, salvo que o impida a súa natureza. En ningún caso poderán subcontratarse actividades que, aumentando o custo da actividade subvencionada, non acheguen valor engadido ao seu contido.
2. Nos supostos establecidos no artigo 29.3 da Lei 9/2007, do 13 de xuño, de subvencións de Galicia, todas as entidades beneficiarias deberán solicitar e obter, como mínimo, tres ofertas de diferentes provedores, con carácter previo á contratación, e achegalas xunto coa documentación xustificativa da subvención.

Tamén deberá achegar a resolución de adxudicación da obra e/ou equipamento, na cal se xustifique a elección entre as ofertas presentadas que, con carácter xeral, recaerá na proposta económica máis vantaxosa. No suposto de non recaer a adxudicación na proposta económica máis vantaxosa, deberán achegar unha memoria en que se xustifique expresamente a elección do adxudicatario do contrato.

Oitava. Efectividade dos pagamentos

1. De conformidade co artigo 3.1 do Decreto 193/2011, do 6 de outubro, polo que se regulan especialidades ás entidades locais galegas (DOG núm. 201, do 2 de outubro) e para os efectos do establecido no artigo 29.2 da Lei 9/2007, do 13 de xuño, de subvencións de Galicia, considerarase gasto realizado cando se teña contabilizado o recoñecemento da obriga polo órgano competente da entidade local.
2. Sen prexuízo do anterior, o concello representante da agrupación está obrigado a acreditar documentalmentemente, mediante xustificante de transferencia bancaria, a efectividade dos pagamentos dos gastos correspondentes á actuación subvencionada no prazo máximo de sesenta días naturais contados a partir da data do ingreso na conta bancaria do aboamento da subvención concedida.

Para o cómputo do prazo dos sesenta días naturais, o concello presentará un certificado da intervención municipal en que se faga constar a data de ingreso na conta bancaria do concello do aboamento da subvención.

3. O xustificante da transferencia bancaria estará debidamente identificada e selada pola entidade bancaria.

Se o pagamento se realiza mediante banca electrónica, o xustificante da transferencia bancaria deberá presentarse asinado dixitalmente pola persoa representante da entidade beneficiaria das subvencións.

Novena. Perda do dereito ao cobramento da subvención

1. Producirase a perda do dereito dos Concello de Toén e Barbadás ao cobramento total ou parcial da subvención no suposto de falta de xustificación, xustificación incompleta ou insuficiente, incumprimento das obrigas impostas ás entidades locais beneficiarias neste convenio ou concorrencia dalgunha das causas previstas no artigo 33 da Lei de subvencións de Galicia e demais lexislación aplicable.
2. Sen prexuízo de calquera outra causa que derive da normativa aplicable, constitúen en todo caso un incumprimento das obrigas impostas ás entidades locais beneficiarias neste convenio as seguintes:
 - a) Non acreditar a execución do proxecto subvencionado antes da finalización do prazo de xustificación e/ou non presentar toda a documentación xustificativa no tempo e na forma esixidas na cláusula sexta deste convenio.
 - b) Incumprimento das condicións establecidas para a concesión da subvención. Sen prexuízo doutros supostos que o impliquen, considéranse incumprimentos das condicións establecidas para a concesión as seguintes:
 - Non executar o proxecto que constitúe o obxecto deste convenio. Para estes efectos, entenderase que non se executou o proxecto completo cando se xustifiquen conceptos ou elementos que representen un importe inferior ao 60% sobre o orzamento inicial.
 - Exceptúase aquel suposto en que a redución do custo final da execución do proxecto derive da baixas de licitación a favor da proposición economicamente máis vantaxosa.
 - Naqueles casos en que sexa de aplicación o artigo 29.3 da Lei de subvencións de Galicia e o concello representante da agrupación non acredite a solicitude dun mínimo de tres ofertas de diferentes provedores e/ou a falta ou insuficiente acreditación de que a elección entre as ofertas se realizou con base en criterios de eficiencia e economía e que recaeu na oferta económica máis vantaxosa.
 - Incumprimento das obrigas de publicidade establecidas na cláusula quinta.
3. A perda do dereito será total ou parcial, segundo afecte todas ou algunhas das actuacións que integran o proxecto que fundamenta a resolución de concesión.

Décima. Reintegros

Procederá o reintegro parcial ou total da subvención nos seguintes supostos:

- a) Nos casos previstos no artigo 33 da Lei 9/2007, do 13 de xuño, de subvencións de Galicia e concordantes do Decreto 11/2009 do 8 de xaneiro.
- b) No caso de producirse o incumprimento das obrigas dos beneficiarios da subvención recollidas na cláusula segunda deste convenio ou calquera outra das sinaladas no artigo 11 da Lei de subvencións de Galicia e demais lexislación aplicable, os concellos comprométese a reintegrar as cantidades percibidas, se as houbese, xunto cos xuros de demora que deban aqueles, segundo o procedemento establecido no título II do mesmo texto legal.

- c) Procederá o reintegro proporcional se o custo efectivo final do proxecto resulta inferior ao orzado. O eventual exceso de financiamento público calcularase tomando como referencia a proporción que a achega debe alcanzar respecto do custo total, de conformidade co previsto na cláusula terceira deste convenio.
- d) O incumprimento da obriga de xustificar a efectividade dos pagamentos nos termos establecidos na cláusula oitava constitúe causa de reintegro das cantidades percibidas xunto cos xuros de demora correspondentes.
- e) Igualmente, de conformidade co disposto no artigo 17.3 da Lei 9/2007, do 13 de xuño, procederá o reintegro do exceso percibido no suposto de que o importe da axuda, illada ou en concorrencia con subvencións ou axudas, ingresos ou recursos, supere o custo da actividade subvencionada.

De resolverse o convenio, a Vicepresidencia e Consellería de Presidencia, Administracións Públicas e Xustiza poderá esixir o reintegro das cantidades achegadas, de ser o caso.

Décimo primeira. Compatibilidade con outras subvencións

Conforme o disposto no artigo 40.1º, letra d) do Decreto 11/2009, do 8 de xaneiro, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou e organismos internacionais.

Porén, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da obra subvencionada.

Décimo segunda. Facultades de inspección

A Vicepresidencia e Consellería de Presidencia, Administracións Públicas e Xustiza, a través dos seus servizos técnicos resérvase a facultade de realizar as inspeccións e comprobacións que considere necesarias co fin de asegurar o cumprimento das normas e requisitos cos que se concede esta axuda.

Décimo terceira. Seguimento do convenio

Para facilitar o seguimento, cumprimento e a coordinación do convenio, constituirase unha comisión mixta de seguimento, integrada por dous representantes da Dirección Xeral de Administración Local e un representante de cada un dos concellos.

A comisión rexerase polo establecido na Lei 40/2015, do 1 de outubro, de réxime xurídico do sector público e estará presidida por quen acorden os membros da comisión por maioría simple e actuará como secretario quen se designe da mesma forma.

A comisión poderá ditar as súas propias normas de funcionamento, debendo reunirse cando así o solicite algunha das partes. As súas funcións serán:

- Interpretación do convenio
- Intervención previa á resolución por incumprimento
- Proposta, de ser o caso, de addendas
- Resolver cantas dúbidas se lle presenten polos membros integrantes
- Calquera outras relacionadas co desenvolvemento deste convenio

Décimo cuarta. Causas de resolución

O presente convenio extinguese polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) Por incumprimento total ou parcial dalgunha das estipulacións que o regulan.
- b) Polo transcurso do tempo fixado sen que se executen e/ou xustifiquen as actuacións obxecto da subvención ou sen se ter acordado a súa prórroga.
- c) Por acordo unánime de todas as partes asinantes.
- d) Por decisión xudicial declaratoria da nulidade do convenio
- e) Por calquera outra causa prevista nas leis

Décimo quinta. Vixencia do convenio

Sen prexuízo do establecido na cláusula cuarta, o presente convenio entrará en vigor o día da súa sinatura e estendera a súa vixencia ata o 15 de novembro de 2018.

Décimo sexta. Natureza do convenio

O presente convenio ten natureza administrativa e as discrepancias que xurdan pola súa aplicación serán resoltas, logo de informe ou proposta da comisión de seguimento, pola Vicepresidencia e Consellería de Presidencia, Administracións Públicas e Xustiza, quedando as partes suxeitas á xurisdición contencioso-administrativa para a resolución de calquera conflito que puidese xurdir na súa aplicación.

Décimo sétima. Publicidade do convenio

- 1. As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas no mesmo, poidan ser publicados no Portal da Transparencia e Goberno Aberto.
- 2. En cumprimento do disposto nos artigos 18 e 20.8 da Lei 38/2003, do 17 de novembro, xeral de subvencións, comunicarase a subscrición deste convenio á Base de Datos Nacional de Subvencións, que opera como sistema nacional de publicidade de subvencións.

Décimo oitava. Normativa aplicable

En todo o non previsto expresamente polo presente convenio estarase ao disposto na Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se aproba o Regulamento da Lei de Subvencións e no Decreto 193/2011, do 6 de outubro, polo que se regulan especialidades nas subvencións ás entidades locais galegas e demais normativa de aplicación.

En proba de conformidade co expresado neste convenio, asínase polas partes comparecentes, por duplicado exemplar e para un só efecto, no lugar e data que se sinalan no encabezamento.

O vicepresidente e conselleiro de
Presidencia, Administracións
Públicas e Xustiza


Alfonso Rueda Valenzuela

O alcalde do Concello de Toén
P.D (Resolución alcaldía


07.08.2018)
Alcalde en funcións
Ricardo González Gómez

O alcalde do Concello de
Barbadás


Xosé C. Valcárcel Doval

Anexo I. Orzamento do proxecto

Nº Cod.	Medición	Designación	Precio	Total
1 00771	1.535,00	METRO DE APERTURA - LIMPIEZA DE CUNETAS Y ARCENES EN TODO TIPO DE TERRENO, INCLUSO ROCA, CON REFINO DE TALUDES Y CARGA DEL RESIDUO GENERADO A CAMIÓN PARA SU POSTERIOR GESTIÓN.	1,82	2.775,50
2 05254	12,00	HORA DE LIMPIEZA HIDRODINÁMICA DE REDES DE SANEAMIENTO O PLUVIALES CON EQUIPOS ESPECIALES, INCLUSO MANO DE OBRA, MEDIOS AUXILIARES Y P.P. DE CARGA DEL RESIDUO GENERADO A CAMIÓN PARA SU POSTERIOR GESTIÓN.	97,66	1.171,92
3 00848	47,00	METRO DE CAÑO DE 30 CM. DE DIÁMETRO INTERIOR, FORMADO POR TUBO DE HORMIGÓN CENTRIFUGADO O DE PVC EMBUTIDO EN HORMIGÓN EN MASA TIPO HM-20 SOBRE SOLERA DEL MISMO MATERIAL, SEGUN PLANO DE DETALLE, INCLUSO EXCAVACIÓN, ENCOFRADO FRONTAL Y LATERAL Y DESENCOFRADO, CON CARGA DEL RESIDUO GENERADO A CAMIÓN PARA SU POSTERIOR GESTIÓN.	37,87	1.779,89
4 00890	2,00	UNIDAD DE BOQUILLA DE POZO PARA CAÑO DE 30 CM. DE DIÁMETRO, A BASE DE HORMIGÓN EN MASA TIPO HM-20, SEGUN PLANO DE DETALLE, INCLUSO EXCAVACIÓN, ENCOFRADO Y DESENCOFRADO, REMATADA.	126,85	253,70
5 00773	7.422,00	METRO CUADRADO DE LIMPIEZA DEL PAVIMENTO EXISTENTE CON MEDIOS MECANICOS Y/O LAVADO A PRESION CON AGUA, DE MODO QUE LA SUPERFICIE QUEDE LIBRE DE ELEMENTOS INDESEABLES.	0,28	2.078,16
6 00754	1.245,70	METRO CUADRADO DE APERTURA DE CAJA A MANO O A MÁQUINA, PREPARADA PARA RECIBIR EL PAVIMENTO, EN TODO TIPO DE TERRENO, INCLUSO PERFILADO DE BORDE CON CORTADORA MECANICA Y CARGA DEL RESIDUO GENERADO A CAMIÓN PARA SU POSTERIOR GESTIÓN.	2,13	2.653,34
7 01073	1.245,70	METRO CUADRADO DE RIEGO ASFÁLTICO EN SOBREALCHO Y BACHEOS, CON GRAVA/GRAVILLÓN Y RIEGO SEMIPROFUNDO TIPO C69B3 TRG (ECR-3), CON UNA DOTACIÓN DE 3 KG/M2, INCLUSO EXTENDIDO Y COMPACTADO.	3,95	4.920,52
8 01081	6.820,20	METRO CUADRADO DE RIEGO BICAPA FORMADO POR UNA 1ª APLICACIÓN CON EXTENDIDO DE 1 KG. DE EMULSIÓN TIPO C69B3 TRG (ECR-3) Y 15 L. DE GRAVILLA ESQUISTOSA TIPO A 8/6 CON EXTENDIDO MANUAL MEDIANTE CEPILLO PARA AJUSTAR EL ESPESOR MEDIO DE LA MISMA A UN (1) CENTÍMETRO Y UNA 2ª APLICACIÓN CON EXTENDIDO DE 1,5 KG. DE EMULSIÓN TIPO C69B3 TRG (ECR-3) Y 8 L. DE ARENA DE RÍO, DEBIDAMENTE COMPACTADO CON RODILLO MIXTO, REMATADO.	3,40	23.188,68
9 01082	1.532,00	METRO CUADRADO DE RIEGO MONOCAPA PARA REGENERACIÓN DE PAVIMENTOS ASFÁLTICOS DE BUENA PLANICIDAD FORMADO POR UNA APLICACIÓN CON EXTENDIDO DE 1,5 KG. DE EMULSIÓN TIPO C69B3 TRG (ECR-3) Y 10 L. DE GRAVILLA ESQUISTOSA TIPO A 6/4, DEBIDAMENTE COMPACTADO CON RODILLO MIXTO, REMATADO.	1,76	2.696,32

IMPORTE PRESUPUESTO EJECUCION MATERIAL ... 41.518,03 €

Nº Cod.	Medición	Designación	Precio	Total
1 09867	1,00	PARTIDA ALZADA DE ABONO ÍNTEGRO PARA LA GESTIÓN DE RESIDUOS DE CONSTRUCCIÓN Y DEMOLICIÓN, CONFORME A LO ESTABLECIDO EN EL R.D. 105/2008, DE 1 DE FEBRERO.	498,78	498,78

IMPORTE PRESUPUESTO EJECUCION MATERIAL ... 498,78 €

ACOND. CAMINO MOREIRAS-SOBRADO
GESTIÓN DE RESIDUOS

41.518,03 €

498,78 €

Presupuesto ejecución material 42.016,81 €

13.00% Gastos Generales 5.462,19 €

6.00% Beneficio industrial 2.521,00 €

Presupuesto base de licitación I.V.A. excluido 50.000,00 €

21.00% I.V.A. 10.500,00 €

IMPORTE TOTAL I.V.A. incluido 60.500,00 €




Anexo II. Medidas de publicidade

a) CARTEL PUBLICITARIO DURANTE AS OBRAS

	XUNTA DE GALICIA VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA	Espazo para inserir o escudo ou logotipo do concello
ESPAZO PARA INSERIR A DENOMINACIÓN DO PROXECTO SUBVENCIONADO		
Orzamento: _____ €		
PROXECTO DE DESENVOLVEMENTO DOS ENTES LOCAIS		

Dimensións do cartel publicitario:



Observacións

As cores da Xunta de Galicia serán as definidas na correspondente imaxe corporativa.

Instrucións para o cartel

- O escudo e o nome do concello serán da mesma altura que o da Xunta e irán situados no ángulo inferior esquerdo do cartel.
- Se o proxecto comprende varias actuacións, a obriga de publicidade entenderase referida a cada unha delas.



b) PLACA EXPLICATIVA PERMANENTE

	XUNTA DE GALICIA VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA	Espazo para inserir o escudo ou logotipo do concello
ESPAZO PARA INSERIR A DENOMINACIÓN DO PROXECTO SUBVENCIONADO		
PROXECTO DE DESENVOLVEMENTO DOS ENTES LOCAIS		

Observacións sobre a placa:

- Dimensións mínimas: Tamaño DIN-A3
- Para a elección dos materiais e do sistema de colocación deberá terse en conta a durabilidade (colocación mínima durante 5 anos).

Cores

- As cores correspondentes á Xunta de Galicia serán as definidas na imaxe corporativa.

